

小木子詩三刻

梓廬先生小像

表姪錢昌齡
謹題



老宦雲中詩更峭承醑舫
法變其貌翻唐入宋謔自
造排比聲律獨得竅戴
石屏後無此妙

受業表姪吳倬拜題

符 卷 六

亥

梓廬舊橐

秀水 朱休度 介裴

檢存舊詩述畧

余先刻壺山自吟橐始乾隆己酉赴選抵官迄嘉慶丙辰去縣歸里凡八年詩為三卷續刻俟寧居偶咏則始丁巳迄壬申凡里居十六年得二卷兩刻皆晚稿今既髮神明惴惴無能為也已獨念自未冠學詩而壯而衰以逮登籍相隔且四十年中間宜有詩而竟寡寡鮮可存者堪自悼也蓋余於詩未嘗無會悟未嘗無志趣未嘗無家教未嘗無師資友益未嘗無壯遊之助卒蹉跎以流於廢無他動與顛乖為飢驅為病纏為姿性弱不能強記以供屬比又為治舉業苦役其心脾課徒令其

日力或依幕勾管簿書參詳劄奏其事更與風雅殊即時有篇什不過坵補獻酬為人作嫁衣替人歌哭以作慶弔辭未謀面以題人照其詩從徇一時悅俗都囂然無真性情語往往脫橐即棄聽其散亡異他日杜門却軌當痛讀書以沉研六義之歸然後自運鑪錘磨洗以出之庶無負師友誨孰意其終於不振哉塞上之歸也病連歲已無意舊詩因人憇患兒輩零星鈔撮余於枕次刪存一卷付工牽連刻壺山詩後署曰附錄不分餘生尚有詩也由今觀之則此曩昔所為適廁晚年兩刻之間殊覺失倫因重釐為三刻列舊詩於前追繫以年年闕詩者著之詩失錄者補之遂取向來萍踪轉徙閱歷之端信手述家常話若干條隨年綴入以示兒孫俾

知余勞生草草未由專學之苦此次盡搜故紙有詩在
而無取者付拉雜矣亦有詩佚而曾為師友許者間廼
存記其題非贅也正以志吾過不早收拾致今日欲藉
為改本而無可藉謂非自棄之歸耶噫詩起前壬申迄
戊申僅存一百五十四首述畧如左嘉慶十七年夏八
十一病叟手書

壬申

存詩三首

古意二首

諸草廬先生評
云真漢樂府

自君之出矣小女共我長昔未未出腹今來已嫁郎
一月三十日二十九夜缺算來團圓以百年能幾月

讀國風一首

鄘風錄載衛風錄河廣巾幘存二詩維風千古仰發情不

自由於義不可往知以禮自閑出辭慨何慷二女本同居雍
雍雁行序豈意人無良所生賢如許亦有魯伯姬實為齊子
女大節炳春秋宣聖特筆與妍醜不相類陰隲天所主珠光
生蚌胎芝菌抽糞土誰謂犁牛子山川棄勿取

癸酉

是歲掩關穴而食專治舉業無詩秋闈律與育泉兄同薦榜前錢文端公謂余
變友叔云聞君家有鍵戶讀書者煩索深閣卷來叔因導余謁公公方患足疽

不下床亟呼移案就床為余評卷連稱好好云此文未合墨裁却不綿弱大有清剛
氣裴叔度西江巨眼愛高派此卷必中因問何業師以張先生對公曰好好此真經

師人師也我前特章薦於朝鄉黨謂何如對曰士林知不知者咸悅服公笑領之
顧謂叔曰我昔辛丑成進士後于尊公六年耳而尊公已下世眾咸悼之君家書香

近亦衰矣復其始者在令姪乎又向余言瓜田兄稱子能擬古樂府詩詩
是君家事尤宜勉之此話蓋六十年矣錄此以見老輩之樂於汲引如是

甲戌

存九首○是歲泰安道中曉行有荒沙明閃雪細路曲盤螺之句餘不記入都
隨家梧巢伯寓查氏碧玉山房既罷禮部試偕余楓溪翁江孝廉暨查伯樞介

仲昆季有唱酬詩南歸客毘陵有游青山莊五言古
體詩四章為錢慈伯所賞均失棄惟記題壁一絕

搖櫓詞

櫓子櫓子爾莫搖伊伊軋軋使我聞之中心跳舟師搖櫓載

郎去地角天涯知何處人言海無邊江無底破帆壞梁不可
知惡風白浪驚人死又云蘇州二月桃李春揚州三月煙花
新揚州蘇州水邊多麗人搬錢如土情如水漂流幾輩人家
子櫓搖郎去妾獨眠去時櫓聲在枕邊屋山鵲叫燈作蕊畫
卜夜卜年復年春風津柳花飄雪津往津來舟不絕幾時搖
櫓載郎歸飲舟師酒敲櫓折

錢慈伯云
張王妙境

雙輪曲

見
知君之去兮雙輪日轉千萬遍望君之來兮腸轉如輪君不
見

同年查笛槎招集碧玉山房分韻得煙字

宛接林巒趣江南三月天輕陰籠細柳微雨澹春煙話共紅
香館唼聯白雪篇杏林方潤色莫放孝廉船

笛槎即欲返
津門留之

集杜五首壽家明府懷遠公七十即送還里

秋水為神玉為骨人生七十古來稀吏情更覺滄洲遠回首
風塵甘息機

必子彈琴邑宰曰知君才是濟川功諸公衮衮登臺省獨泛
滄浪學釣翁

王母晝下雲旗翻時聞雜珮聲珊珊自是君身有仙骨衰顏
欲付紫金丹

南極老人應壽昌眼有紫焰雙瞳方看君宜著王喬履青史
何勞數趙張

百年地僻柴門迥鄉里衣冠不乏賢但使閭閻還揖讓濁醪
麤飯任吾年

秋日遊毗陵青山莊既賦四詩又題壁一絕

猶剩平泉草木風韓家鸚鵡去雕籠人言一霎蘇臺夢也不

安眠叫夜蟲

別有感也

乙亥

存一首○是歲客吳門許果使署轉客趙太守郡齋有同人擬蘇臺懷古詩又有秋夜泛石湖登楞伽山過治平寺諸詩均無存

戲集唐人長短句當古別離曲

寂寞江天雲霧裏杜甫滿眼流光隨日度元稹碧雲芳草兩

依依韋莊落花不語空啼樹白居易花落知多少孟浩然風暖聞

啼鳥高弁早是傷春夢雨天韋莊春漏方殘一聲曉韋應物客

有哀時失職而聽者李白覺坐而思韓愈怒焉心如擣陶翰

千里夢難尋溫庭筠送客歸遠道韓翃杯銜欲別前韓愈無限

青青草皇甫冉好花爭奈夕陽天張泌天若有情天亦老李賀

噫風塵瀕洞兮杜甫東西南北貫休皎皎之子子自獨立盧鴻

實獲吾心兮盧鴻之欲歎息李白春已去王建日已暮郎大家芳

菲節柳姬留不住李萼遲美人兮不見陳子昂共握手而相顧

徐堅終恐絆騏驎之足不得展千里之步任華欲訪桃源入

溪路王昌齡苑花亂落如紅雨李賀側身天地更裏古杜甫會

湏一飲三百盃李白酒不到劉伶墳上土李賀

丙子

存二首。是歲仍客吳門有同人游虎阜詩又郡齋新治見山園集諸篇又憶家六絕秋赴宛州李惠園夫子之招有呈夫子七古一篇又隨師至濟寧監

司署有太白酒樓詩均失棄惟記酒樓頭聯云先達非無宋宣撫微時早識郭汾陽為育泉兄所許

盆梅次趙朴菴公子韻

越瓷宣石紫新粧點綴依然空谷芳仙品宜陳青玉紫冰心

應戀白雲鄉粉墻夜照橫斜画紙帳春生夢寐香一夕窗前

少君伴相思教斷玉川腸

文鶉行

爾雅鶉天雞郭璞注鶉雞赤羽逸周書曰文鶉若彩雞成王時蜀人獻之

吾聞葛翁化蝶蝶五色朱翁化雞雞五德小物托生非尋常

何況主衡星散負奇質文韜廼天難產自西蜀西當年貢周
室異采輝龍墀金眸玉爪不凡材鎔落星宿拖彩霓何時羅
致斐凡上結璣光動紅琉璃迎風耀日翻不定看朱成碧隻
眼迷豈其曾向淮王宅仙鼎偷得丹砂食食多遍體生文章
遂爾雲霞奕奕光如拭韜方韜方何不高舉凌天衢乃此局
促樊籠拘珠簾繡柱縱美非爾居恐爾臨波照鏡生歛歛毛
羽雖奇難展舒豈若家雞野鷺水邊沙際飲啄得自如

丁丑

存四首○是歲再罷禮部試由津門而歸省先君子於淮安郡齋時淮揚大舉
河工羽書旁午五太守留余隨先君子佐理河務前牘不遑詩非所暇也先君
子謂五公曰此番騰空湖面多方為弱淮計必有速效但十萬里來水幾有消長不
出十年仍恐黃強為患爾時公若開府江南當謹遵原奏陳請築還高堰以劑其平
萬勿為惜費計實國家
無窮之福五公首肯之

唐方元英遺硯歌為津門查二

善和賦當是漢硯
方所藏也

有石有石光離離云是桐廬處士之所遺縱乏鐫銘與署款

傳之世守無纖疑厥角礪何綴錢四審視均作五銖字歲深
銅汁融土花染出天然文采異入手耀寒芒編爛文墨場繡
如青鐵色純如黝漆光濃如老苔暈深碧淺如嫩籜抽新篁
疑經媧皇鍊五色淋漓元氣周中旁嗚呼李唐之季遭多難
才人潦倒江東亂補唇有術無補時智隱身名徒扼腕殘蟬
孤雀白雲原瘞玉何年升几案定知知己姚秘監筆札往還
同賞玩可憐神物顯晦靡定踪桐江寶氣騰長虹一朝呵護
來海東查君好古儲藏多獲之一曰三摩挲花青蕉白都無
色龍尾馬肝莫或過范喬况克承先志好添二十四硯齋中
羅尊甫蔗塘先生齋名吾家舊弄米山等璠璣雲烟過眼安有諸作詩寄
君增欷歔鎔金匣貯重千鍰慎毋輕出洗潺湲恐洩精靈驚
鬼怪雷霆遁入芥柯山

過廢園觀荷

梁虛落月無栖燕柳折懸風有蛺蝶猶賺閒人來歇脚亂紅
開騰湍池蓮

集逋翁句為顧客題聽泉圖

何地避春愁有山堪結屋青嶂青谿直復斜野人愛向山中
宿山連極浦鳥飛盡世人那得知幽徑畫作一障張床頭呂
梁之水挂飛流宜遠聽宜近聽忽如空中有物物中有聲聲
清泠泠鳴索索回雪從風暗有情

畱別莊胥園同年

時寓津門

伶俜瘦骨愛多才迢遞長途悵獨回此去秋淫鷗鷺在落帆
只少故人來

胥園故居在秋涇橋

戊寅

存三首。是歲授徒南湖之濱有南湖書舍云窓落風帆影床通水鳥呼為種梅所稱又有滌湖紫藤花歌又病中雜詩數首為感柏堂文所稱惜俱無存文

時館東門每遷往舉微
文疑義相質多所討究云

陸抱青先生輓詩三十六韻

驚說天隨子新從太乙君
老成人寂寞後死涕紛紆
勁草悲朝露
光星墮夜雲
門風承絕學家訓
挹清芬共數機雲美
能傳翰墨勲
詩篇壓蕭范經義續河汾
著述常無倦
丹鉛晚更勤
下帷窮董子不第老劉蕢
白首潘輿侍青燈姜被熏
網維堪勵俗
圭壁竟埋墳
往事通宵憶
負交數世殷
草堂藤爛熳
書屋桂醕醕
問字從韶獻
刪詩偕斧斤
鄭谷讀薛尚書詩集詩落筆空追唐曾蒙借斧斤
僧窗還杖履
客舍伴朝曛
葛嶺煙澄澹
澹錢江水泣
沅聯吟同翦蠟
作賦共誅蚊
一自師資遠
幾將筆硯林
謀生頻異地
失學感離羣
昨歲投三泖
扁舟返五汶
深秋初病起
暫見即情忻
鬢揷萸房冷
顏開菊酒醺
說經猶衮衮
話舊尚齷齪
豈意成

長別從今益寡聞連年書札在回首死生分賦鵬鷺斜日駢

鸞吊暮雲藥難憑扁鵲數莫問靈氣分禿筆餘新塚陳編拂舊

芸歌殘蒿里曲腸斷柘湖濱居剩三楹屋田無二畝芹誰憐故國無生

計惟種南塘二畝芹甫里句也遺言淒易簣先生臨沒猶向人間度近狀錯愛媿張軍期許從前負

夢魂此後塵眼同苾刺著心似亂絲焚祇有生芻莫倍憐宿

草薰乘烟已縹緲燒燭但氤氲歎逝知無及銜哀豈有堪平

原不可作誰復細論文

里翁有喪其孫而悼不已者索余為哀辭集楚詞語一

篇慰焉

竊悲夫蕙華之曾敷兮懷琬玉之華英日月忽其不淹兮羌
天頽而喪榮亾春風以披離兮形銷鑠而瘵傷心憫憐之際
悽芳霑余襟之浪浪仰明月而太息兮惟昭質其猶未虧余

以蘭為可恃芳聊假日以須時何芳草之早夭兮洎莽莽與
塋草同死隱思君兮徘徊氣於邑而不可止豈其有它故乎
將天命之不可求路曼曼其修遠兮艱長夜之悠悠與前世
而皆然芳焉託藥而上浮春秋連連而日高子遂悶歎而無
名願寄言於浮雲兮與太初而為隣

柘湖胡烈婦詩

餘生無倚着之死獨從容地下隨君子人間貴女宗風悲湖
上草月冷墓門松多少往來者請看馬鬣封

己卯

存二首○是歲省先君子於淮安李太尊署留課其公子六人且司筆札事冗
無詩秋皆停生金陵遂作柘湖之游有五言古詩十二首寄有泉兄慈伯弟

皆許可惜其棄為人持去
後于甲子年始補一律

題白下闌上人南窓集

西竺僧先返南窓我到遲雪鴻空有跡峇嶺獨抽絲一覽詩

終卷三更月在枝烟消鐘磬斷想見苦吟時余以己卯八月二日擬承恩寺寫上人先以朔日示寂故首聯云烟消五字上人句也

鹽城縣謁宋陸右丞祠故交李君時沛令其地因往訪焉

生東海死南海海水有時乾丞相英靈終古在一角崖山天地間滄桑陵谷幾更改吁嗟乎君臣已自葬魚腹父子不見生馬角黃雲南國盡銷沉白髮西臺徒慟哭海雨颯颯海風涼我來荒祠酌酒傷千秋海上事孰詳莫問廬陵鄧侍郎

庚辰

存一首○是歲元旦獨上平山堂天寒雨細竟無一人游者余亦匆匆理裝不及詩入都三罷禮部試時與袖堂丈同寓常以經說就正文亦導余述張惕齋

師所考辨相證文所著尚書釋天早成書都下咸重之與羣公選往同度亦得編輯緒論有向學之趣各忘下第愁也王西莊先生專漢學尤習尚書家每向余言得輯羣說彙通而詳定之以成巨編越三十餘年而尚書後案始出世難哉余既就曹慕堂太史之招課其公子錫齡祝齡秋冬孜孜講習舉業遂無詩惟冬暮有寓懷數絕

澤翁表叔見曰詩成苦且場期近矣不作可也

寧波邱氏三松樹徵詩一首

三株樹古走龍蛇鐵幹霜根託海涯南渡春風忘甲子東隼
老屋貯煙霞應邀白雀僊人語合傍青牛道士家忽憶北山
堂下路九株誰復見槎枒

辛巳

存三首。是歲四罷禮部試將歸諸相與太史介余于張退園觀察偕赴南汝道之任秋七月河決楊橋豫省被災者四十七州縣張公挈余自信陽疾趨汴

汴城六門皆塞官民梯城出入八月十三日欽差劉相國兆將軍來司農踵至始克填道進北門與壽堵禦履勘東西壩基并勘引河相公策馬中流軟沙陷及馬腹萬人咋舌遂奏之劉駐東壩以開歸道承之兆駐西壩以南汝道承之衆主營度疏洩事又奉命南北河督臣新舊撫臣常川臨工設局工次調遣一切機務即于八月十八開工和許百晝夜趨十一月初四合龍門恭惟至誠奏格呼吸通天佑神風掣溜提響捷應皇矣赫矣奮庸熙載監司百執小大效命霜厲風嚴餐靡宿區區握寸管以赴事張燈草舍草檄飛書又取告夙夜勞哉是臘四信陽嘗黑夜跨生馬顛越於黃泥所經之野米坑東草間墮憊甚矣乃起日而奉六百里之檄復赴省故拙詩補述信陽一律有苦憶邯鄲夜征夫冒雪馳之句餘則竟無一詩

邯鄲二首

落日邯鄲道崇臺放眼寬連山低似屋古邑小於丸歌舞千
年歇天風六月寒美人奈何許悵望彩雲端

天涯栖不定得得走江關塵夢幾時醒浮生何日還仙祠今古在舊事有無間一過邯鄲道名心似水閒

三十初度楊橋客舍作

生年三十媿昂藏七度懸弧滯異鄉鞍背船唇幾曾歇杯殘炙冷最能嘗蕭然伴影天將黑到此思家夢更長今夜堂前雙白髮定呼小女說遊梁

壬午

是春豫省各屬有災後繕修城工凡十餘處奏委張觀察蒞其後閱實其工程節次以聞又時方發京兵西征豫自安陽入境西出潼關分十起行走即委張

觀察彈壓護送雖長途策應未免紛馳如纖幸力役子來鳩工日起而軍行如水罔越部伍是以於往來提調間得借駐宿餘閒借觀察訪古登臨乘輿為詩若稿成可以盈卷苦乏倚馬才往往有句無篇今惟檢存得殷比干墓一首老子廟一首真珠泉一首尉氏道中二首為本年詩又甲寅年有憶拜孫登祠一首憶游龍門一首又甲子年有補太皞陵一首鐫鼎原一首孫登祠題壁一首百泉一首水冶一首韓魏王祖墓一首湯陰岳祠一首如是而已他若訪韓陵一片石為明汪某補書又謁韓魏王祠觀蒲陽所書畫錦碑及李公擇所書樂事堂記及溫公所撰祠堂記及魏三自書觀魚軒休遠亭詩碑又元明來碑數通並佳又謁衛源神祠又拜嵇侍中祠又游明月嶺又游陳州柳湖食巨鯽訪子由讀書臺又於睢陽訪雙忠祠又於洛陽訪白馬寺尋龍門附近諸蹟觀康熙間汪退谷重書白香山修寺記刻於白髮屏間可



梓廬舊稿

九

墓碣又東抵商邱飲宋氏西陂叙世講評書盡歡洽甚已上諸屢皆曾着意為詩都
從忙裏錯過了雖殘聯勝句如夢中囁語自宋潭不記不大可笑哉乍戴事而余病
於汴城者二閱月頗委頓有閒憲一詩觀察復邀余至信陽浮淮以歸故甲子補述
詩中有舟發固始二首抵盱眙三首北歸值里中大水七月廿七日僕家鶴洲草堂
傾於雨為之慨然余久動思靜因借祥符僧舍閉關三月思溫習舉業而工夫短不
濟事其冬有哭張坤西弟二詩恨不達意聊以誌憾通一年僅錄八首餘並見後卷

殷比干墓

武王封孔子志志曰殷春秋義宣聖之蹟宣和題古石一方
立天地彼小儒者較求點畫實以鍾繇梁鵠何多事嗚呼比
干諫而死死不稱忠稱勇稱義稱以仁而止嗚呼可以知仁

矣

育泉兄云古質
似昌黎翠樵

夜半謁老子廟於古函谷關

夜黑山深一鞠躬那瞻紫氣滿林風祇應配食關前尹難索
解人河上公野語漫傳白衣老古神曾養紫微宮猶龍果否
傳龍種贏得三唐廟號崇

彰德真珠泉

清鏡一泓碧真珠萬顆圓無心常皎皎有本自涓涓
於画波聲細似弦春光共川逝俯仰感流年

尉氏道中二首

去秋乘舟入汴城滔天水勢夢魂驚重来相顧掀髯喜麥浪
風輕一碧平

去年繫船楊柳顛今年折柳作馬鞭無復哀鴻鳴四野更休
碩鼠起中田

閒窓

閒窗竟日雨漫漫病骨森森六月寒起對僕夫眠對景更無
客至問平安

張秀才弟新輝二首

我去劉三載斯人已九原黃泉夢難到白髮塊長存

渠有老母況棄

閨中婦莫畱乳下孫危哉餒宗祀何以慰幽魂

人壽曾何定君才絕可憐讀書心有得下筆氣無前共學賒
來世修文未壯年玉川數間屋一過一潛然

癸未

存四首○是歲五罷禮部試由濟寧以歸

夏仲過沂上畱李惠圃夫子官舍三閱月將歸賦別爲

玉昆李四首

磁石能引鍼琥珀能拾芥氣感自相合每在形骸外越石雖
齊相豫讓報晉卿彼雖狂且愚區區抱微誠太古無弦琴知
音豈在聲世人青白眼難與辨渭涇踪跡參商異氣誼芝蘭
并可知酸鹹外別有臭味真不然如水淡那比如醴親

代馬嘶北風越鳥依南枝誰能久行役漠然桑梓思況復寸

草心喜懼迸一特明發聽雞鳴輾轉曷自持三復陟岵篇愁
見白雲馳羨尔南陵蘭芬芳吐華滋雙鳳舞雍雍其樂不可
支我亦何爲者漂泊隨蓬飛翱翔固所願門閭望眼癡亮無
晨風翼圖南欲何之不如學鶉鷄局促守藩籬

寸筵可拂鐘蠡勺亦分海幸托哲匠門寧甘薄自待恭惟藥
石言適中病所在泛濫誠無益茫茫失真宰譬彼琴瑟敝弦
柱必更改逝將返吾術勵精起疎怠千慮或一得庶免貽後
悔

三五月正盈四五月便闕臨風一尊酒裴回不能發徘徊亦
何爲所惜遠儀刑來如被春風草木自知榮去如失明鏡妍
媿曷由呈矧無切磋友孰與發新硎爲山虧一簣繙并羸其
鉅學戒畫中途功懼毀將成庶幾各努力勉勤昔經

惠園夫子評云

無論是魏晉是唐祇覺
情餘於文便饒古意

甲申

無許○是歲侍先君子客松
江李太守署課其公子六人

乙酉

存二首○是歲坐關六閏月究
心時藝與吳蘭陵丈往復討論

冬夜濟寧客舍偶成

流光擲如梭
閒身飄似葉
乍此休役車
徘徊南池月
寒吹警
率禽霜清山
削骨冷候異
鄉邦渺懷眷
夙昔三過瞥
十年春
秋負佳節
余自丙子癸未及今
乙酉蓋三至任城矣
鐔暗一青燈
夢違雙白髮
默然慚故
吾酒醒思元元

寶刀引為蕭縣張君賦

秋屋夜半吹陰風
掣雷閃電光
熊熊肌寒生
粟背生刺玉
龍
三尺懸空中
當年張公氣
蓋世提刀轉
戰摧羣雄
迅掃妖氛
東海東順風
揚駕千朦腫
張公怒髮張
雙瞳人命賤
於花蟻

蠓殺人如草非得已霜威颺擊開曹鞞天清地寧橐矢弓鼎
平久矣韜爾鋒百年風雨鳴出匣至今腥惡聞蕭蕭懦夫掩
鼻不敢嗅又况前驅決胆披肝胸大食刀脊坊劍不如此物
精氣騰長虹曾向滄溟血深染與人心成大功公孫寶見之
球貝同索我作歌出示我雪花新淬鋹生茸以手屈之圓作
鏡鏗然挺響鳴青銅酒酣耳熱摩挲起明燈豔艷月溶溶安
得壯士奮臂迴環舞秋水飛濺耀瑜紅

丙戌

是歲六罷禮部試始遇特恩挑選下第舉子余得二等需次育泉兄得一等
分發陝西遂偕以行冒暑兩去勞甚甚至則病稍瘳兄有三水之委同往部署三

月而余聞訃嚴冬奔喪歸在秦有十數題欲為詩者均
未脫藁今惟補述潼關一首永壽一首淳化三首而已

丁亥

序一首○是歲在李
惠圃師山東撫軍幕

八月十五泰安山中夜行感賦

明月深山也自圓驅車入夜未停鞭他鄉飢渴愁如許游子

關河命可憐，豈有素冠行遠道。獨無令節恨終天，憑高南望
霑襟血腸斷。悲歌陟岵篇，先君子以去歲暮月見背

戊子

存六首。○是歲與李南澗定交，客在平。

在平縣馬周墓懷古

可歎新豐送旅人，一官早擲走風塵。逢秋鵬翮青雲上，得志
驚肩火色伸。縣令那能知國士，英君始識待良臣。漢廷終棄
長沙策，不及凌煙閣画新。收駘之寄必待忠良，昭陵賜周語也。

秋憶四首，戲為友人作

旗亭曾聽唱涼州，每到花時憶莫愁。一夜春風同繡被，十年
舊夢隔青樓。

撥盡琵琶曉漏寒，如花別後隔雲端。使君重到郵亭夜，魂斷
當年秦若蘭。

秋香零落動人憐，缺月無由得再圓。
未減風情，柳負外已成薄倖。杜樊川。

漫說章臺窈窕娘，柳枝未比桂枝香。
芳菲折盡他人手，那教韓郎不斷腸。

冬日舟過平望作

幾年憶斷玉人簫，猛覺西風敗柳搖。
一片疑雲疑雨態，櫻桃湖口西眉橋。

己丑

存八首。○是歲署安吉州學正，惜補得嵒縣訓導。

春遊西湖曲

山圍水養寬，復寬多少樓臺畫。
中西春風鬧處，暮雲亂春來頓覺。
湖山隘蜂逐繁，花蝶逐風衣香人影何匆匆。
濃抹相邀澹粧出，周三十里城為空。
而我不到十七載，醉吟夢想西子。

態趣入煙霞錦綉堆舊山拭眼青仍在滿鏡通紅照綺羅衆
髮皆鄉音沸笙歌雲颿画舫踟躕轉快馬輕鞭歷碌過韶光一
片茫如海誰遣羲和駐景待桃花醉人人未蘇鐘落南屏聽
生駭裏湖外湖學魚穿上山下山隨螺旋窮日之力愁日短
天上歸來山起煙

安吉學舍初夏偶成

春隨水逝漫生嗟碧樹扶疎晝景賒簾幕新晴花蹴燕池塘
宿雨草喧蛙閒行檢點穿籬笋偶睡消除滿盞茶欹枕山齋
如太古溫風也到冷官家

落花四首次張文韻時張挂職寓居

莫抱香魂上訴天繁華過眼揔淒然芳心早向蜂房割剩粉
惟將燕壘填幽徑雨深苔上壁晴原日暮草封烟也知不是

堅牢物未免春風怨棄捐

一番造次一番風聽入無聲細雨中水不還流偏滾滾人當
垂老更匆匆綵雲易散浮光短紅燭成灰濺淚空閒煞林居
張仲蔚園中竟日掩蒿蓬

春來病共酒缸深無復榮華夢上林猶愛因風吹座內獨難
迴月照牆陰看泥沾絮思禪理知色成空悟梵心却怕黃陵
廟裏去鷓鴣啼處不堪尋

憐渠入土色猶新淪落相逢各惱春細雨黃昏簷有鬼游絲
白日院無人飄殘南浦餘青草吹向西家散玉塵來歲不愁
不爛漫須知更老客中身

不能飲嘆

維古私燕名曰醺能飲飲之不能已勿苛求人人易後先王

設法類如此譬猶強弱不同科射不主皮本之禮觴政雖寬
怨醒人醒人頭低心獨耻天生酒星地酒泉清號曰聖濁賢
擬銷萬古愁合千歡女智創物良有以衛武悔過悔其醉夏
禹惡酒惡其旨百觚不亂多益善五齊不同苦斯美況我輩
非禮法拘脫畧公卿本狂士舞席僂僂態便佳倒枕軒軒夢
尤弭縱為酒困何傷乎不逮聖賢正多矣持齋周澤尚如泥
荷鍾劉伶那便死高士封作醉鄉侯王孫眠到長安市孟公
投轄勸肩休文舉開樽豪莫比彼皆快哉我何有誰為限之
天所使閻浮提王主祿籍毋乃子奪由憎喜吝我富貴嗇我
才畀區區者猶靳是明月見笑花見羞枉對良辰空杯區焦
枯皮色乾似薑磊塊胃中結成痞霜天破帽晨犯寒風雨孤
衾夜澆水不能飲苦只自知客嘲難解恥難洒誓將啜餽復

舖糟學卧甕人捉不起酒腸日沃定日寬當如為學進勿止
無錢拚典青羊裘歸告細君君曰唯

湘湖曲

湘湖煙景似西湖終日浮家在畫圖況有蓴絲好多種不隨
秋稻入官租

庚寅存四首

春日逢李南澗於西湖即送之官南粵

髯也仙才真絕倫別來消息幾冬春誰知東海停雲遠忽向
西湖藉草新百里弦歌未踈濶千秋述作獨艱辛嶺南桃李
今猶盛憑仗重扶大雅輪

寶性寺訪淨修上人

勞人不耐逸無事獨尋勝訪僧叩精廬禮佛打清磬文室即

不寬花石頗幽靚老菊媚黃輕疎筠交綠淨修公此間住踪
跡深自僻拜經逾十年鶯花不驚定問僧何能爾心清體從
令風旛本非動動者心之病入夢豈知覺入醉豈知醒蘇倭修切
語令我悔恍然見真性秋山自逶迤秋水自明瑩何當棄儒
官細將禪理證

葉芝行齋頭看菊二首

踏破幽人三徑苔一籬秋色倚風裁不曾狼藉稻花雨耐可
商量竹葉杯

豈知世上有繁華空谷宜開隱逸花歲晚相看人意澹天寒
生怕夕陽斜

辛卯

存四首口是歲有述懷句云因病早衰敢稱老為貧卑仕不成官又落花句云
春來春去留雙眼多病多愁老一身並為郵縣范翁所賞又隔水深刺蚊何毒

掠案橫行鼠太黠則暑
夜句也澹川甚稱之

夜雨次韻

多病春裏稿似灰雨聲偏逼枕函來吹簷不住丁東鐸鳴瓦
幾番歷碌雷料得小園籬長筍所愁破屋礎生苔冷官明日
無人事拚卧蓬扉堅不開

雨後葉芝谷邀同人明心寺小飲

曉巒開積陰春野含餘潤出郭蠲塵懷尋山副夙願幸補老
天漏適取故人信衝泥無倦容觀水有逸韻懸崖噴潺潺淺
瀨注粼粼林叫孤鵲來草喧亂蛙赴寺隱山腹幽鐘傳馬頭
近遮門蘿竹合背閣雲煙襯久坐雜花落劇譚交觴進輕暉
照窗戶空翠染衣髣攬勝情所愜閱農心獨愁雨深麥穗稀
春寒桑葉嫩及今轉晴和庶後免饑饉身閒多病纏家貧微
祿徇浮生已無聞榮名安可問偶乘嘉會歡聊寫羈踪悶芳

菲知待人默念流光迅

溪夜

夜靜煙俱徹溪寒月更融碧分遙岸草紅辨隔江楓官已先
秋冷心還照水空一尊移櫂去兩面畫屏風

述嬾

軟螭昂不起羸特倦難支楊柳眠依檻薔薇卧貼籬癡奴春
夢裏醉妓欠伸時物態紛如彼余情信有之年增豪氣減病
久壯衰疲夜枕晨猶戀朝餐午始炊雙扉冬雪擁一榻夏陰
移坐教羶痕破行從帽影歌衫蒸蟻蝨滿袍染酒漿滋堦下
煩扶僕門前怨送醫却憐髀去肉空歎髻添絲亂葉堆書帙
浮塵積硯池任封荒草徑閒掃落花墀剥啄無人到揶揄有
鬼窺何心求避俗所患適為師境僻偷安慣官閒送老宜憂

貧姑聽婦失學亦隨兒得馬原非喜亡羊底用追此身甘朽
棄并悔苦吟詩

壬辰

存八首○是歲
徵入杭州書局

臨安襄古

鵲聲啼破舊江山辛苦車塵抱器遷趙寶雲孫仍半壁秦謠
水市應千年誰教燕騎更番出却把杭州一曲傳終遣朝元
鸚鵡去聽搥戰鼓下湖船

黃稚圭云深
入義山甲裏

讀樊榭山房集

偏是文章憎命達祇應詞賦與名存杭州山水揚州月贏得
工夫細討論

菊影四首和人作

三徑寒光一籬画花神夜出欲徘徊芭蕉葉外幽移壁蟋蟀

聲中冷懣苔月下

碧澄倒插波心朶金散微吹花底漚楓落吳江分汝冷櫓搖
巫峽背人秋水中

寒花窺相如人瘦晚節和光也自圓却怕少年脂粉態玉臺
一例鬥姝妍鏡中

纔逗花陰一點青滿齋秋色瘦瓏璚淡於墨潘橫披画
集悄有霜魂背出屏燈下
橫披字
北道山

白菊

眾豔都消歇秋籬靜意存微霜難著迹寒月與招魂品壓金
無色畝嫌粉有痕真堪素心賞晨夕伴南村
塵月船云第
六句強對

詠黃葉

野畦照日荒荒遠村店橫煙薄薄遮已過登高無菊影忽疑

入夢見槐花

是歲不赴春官

天寒顏色知誰愛歲暮飄零敢自嗟祇有

青山同寂寞尚嫌紅葉近繁華

癸巳

存四首○以下三年仍在書局是歲監理敷文書院

熱甚過三潭水榭偕老僧苴草席裸卧於地水風荷氣
翕鼻如醉覺而有作

選得追涼地湖南水榭偏遠山浮枕角輕夢到鷗邊柳外飄
村笛荷陰閣釣船忘機自忘暑覺坐意悠然

湖上載雨晚歸

雨氣陰連夜氣生濛濛柳帶六橋橫峯遮靜女垂簾影槽送
飛鴻過野聲米老幾堆新潑墨馬家一角舊聞名背馱紅日
吹彈去多少豈儂早進城

至日雪張純初用東坡聚星堂韻索和

今年園亭遲落葉冬暖暖過大小雪一陽戰陰陰作氣半夜
飛花寒陡絕早登虛閣眼晃搖待埽盈堦手僵折林梢聽疑
翠禽死檻平望訝青峯滅筍鞭深壓土愁鏡松鬣橫撐牆自
掣其門懽呼犧尊門貧子局縮鶉衣纈人間苦樂物寧齊世
上炎涼態何屑有客數思走七言追古險韵刮一瞥才非小
謝敢揣稱律設大蘇難浪說反义羔袖仰屋吟冰簪冷挂過
簷鐵

次日復雪黃穉圭用前韻索再和

昨夜癡吟門詩葉瘦肌生粟酸涕雪天與詩人助幽興朝來
飄舞仍不絕閃空驚接草屣隨堆高愁壓茅檐折千盤驛路
轉應迷萬室瓦煙炊欲滅回飈俄息歛氣嚴微陽慘露浮光
掣聲礧照山石湧濤惶松綴樹冰生纈誰呼龍門美酒杯更

鋪武昌細木屑空摹硬句牛力挽懼失清光駒影瞥烹茶且
繙陸羽經焙餅還續吳均說再接再厲搜索艱墨乾硯凍呵
生鐵

甲午

存七首○是歲
監理紫陽書院

追題朋湖修楔圖為故同年程君令嗣作

會稽內史自寫叙遠陸柬之始寫詩典午以來無畫本宋龍
眠叟廼補之亦有天台劉仁本續蘭亭會前事師四十二人
劇歡賞補詩繪圖鐫之碑至正庚子配永和秘圖峯蹟於今
垂未若武林修楔舉別開生趣尤稱奇濯西湖水流以觴集
南華字綴作辭卷中詩並集
莊子字為之六橋兩峯快吟眺差勝列坐曲水湄
一一騷壇開新句無不成篇免罰卮翰林寫詩釋子西孫翰林
釋明中
並會
中人衣裾聯美如填虎王謝煙霞古未散宋元風雅近可追

昔所曾有今皆有使人披卷徘徊思吁嗟乎人生彭殤可齊
視此理漆園深得知得逍遙處且逍遙羣公達視其庶幾此
圖此詩詎妄作宜乎安定嗣子珍傳貽追題一篇已陳迹聊
俾攬者感於斯

翟晴江云借與序結語作
結感程遇也詞婉而傷

有以雜畫六幅屬題者各予一首

墨龍

一陣顛鵲風城摧黑雲壓飛電大於拳
硯曾卷萬甲乘龍一怒乃如此筆底雨聲聽
雲雲

寫意江景

煙濶江吞天江渺烟沒樹一葉浮碧空記出
瓜州渡

匹馬

韓幹畫馬十四匹最後一匹馬中龍不嘶不
動尾搖風幹画

亡矣坡詩存讀西馬詩見真馬一笑披圖今亦頗

着色山樹

彷彿錢塘湖上峯春紅秋翠四時濃
卽教添繪半湖水畛畫樓臺更幾重

乘槎裔

禹跡豈不遠導河自積石多事博望侯
乃向崑崙索河患在中原瀾翻受其厄
遠窮火敦腦曷濟治河策猶歸勝徐市
三山沉海舶適足供画師點圖聊戲劇

孤松

翠濤上中下盤黃海三十六峯一本何山移
得撓天矯立蒼龍

乙未

存二首口是歲仍
監理蕲陽書院

古藤次韻

不花不葉老崆峒
駕樹撐雲絡石缸
歲月精靈天所與
蛟龍性格孰能降
蘇花繡骨堅而瘦
甕樣蟠根恠且龐
碧眼仙翁愁剗手
去長虹一道化滄江

晚菰次韻

貧家生計分蘼鹽
看漉青泥曬滿簷
雪色千層披甲白
霜華幾夜透根甜
但教稚子敲能慣
要問傭夫買更添
冬甕春盤差可續
濁醪麤飯耐須兼

丙申

存十首○是歲以秩滿膺薦入都
既以知縣需次隨就山東學政幕

二月十九日出杭城
由虎跑泉登六和塔
循江干進雲栖
取道理安寺歸順
尋石屋水樂洞諸
勝得六十韻
曉出鳳山門
細霧蒙如紗
雲脚漏旭光
漸噪春林鴉
祖塔偕

嘗水僧雖勤捧茶泉移南嶽遠味較中泠嘉舊事怪且神野
老傳相許詩題蘓玉局銘勒宋金華匆匆讀一過步轉松徑
斜攀塔六和近眺江三折賒塔高輪迴盤江平鏡新磨漁舟
散點點輕若泛鳬駕四十二章經分書各名家粉牆撫翠墨
宋刻完無瑕睇遠意何極探勝情益奢水濱蟻引隊石岸蜂
鬪窠行行數里餘北折村路叉載過棲賢寺夾道編籬笆籬
外一無見見綠天高迤修篁不知數多於恒河沙古樹不知
年出世同釋迦勃發山氣肥潔除人力加迤級高漸引深叢
幽轉呀欲前後且顧乍顚仰復嗟如是又數里屋角露髻丫
梵唄隱清響毋乃雲棲耶蓮師此開設精行通三車至今規
條守滿山徒衆多或撞鐘擊鼓或樵石耕畬或轉移於室或
負戴於塗人各專一事莫或惰而汙儼若宣聖門因材列四

科又如鄧相子執業各生涯寺不飾金碧殿不增魏義山坡
放生所餵飼任寢叱牛宮與羊圈豚柵及鷄奴善男女所捨
不殺不鞭撻人畜均受養平等信無差別途出螺峯復得林
泉窩寺藏山之腋山曲路盤蛇到門樹合沓登閣峰谿訝紅
茶一株豔火齊迸丹砂高不滿丈餘萬朶花駢羅項從虎跑
見二美交珊柯那得寫生手點筆一摩挲大慈理安各有山茶一巨本並見花不見葉我
游樂忘倦僕言嘖相呵夕曛漸沉落餘興猶騰挐水樂洞口
黑石別屋底窪竝笙耳傾聽苔蘚手細摩咄哉半閒堂賓客
半朝鮑題名紀咸淳千載涎吐蝸石屋有賈似道領客某某題名語僕且莫怨我
言不汝訖今日普門誕湖外人奔波六橋笙歌沸三竺燈火
譁何如向裏山避喧尋薜蘿踈踈映山紅卻風動馥馥花不似
桃李堤蹠藉紛如麻兩三采茶女携筐手摘芽不似綺羅隊

惡少蠅集爪孤賞足怡悅暢辰未蹉跎呼鐙一覓紙題詩肆
滂葩題罷翻身睡身翻入雲霞

曹州試院八月榴花盛放和錢公子作

灼灼珊瑚海上枝無端離夏故開遲羞他細柳新蒲伴燒過
闌風伏雨時點綴秋容未遲暮破除人悶得新詩空庭客去
誰憐惜露冷蛩吟好自持

重過兗州有感

余總角時受知安溪李惠圃先生丙子丁丑間先生守兗留余讀書官舍屈指今丙申二十年矣

銜感茫茫久益哀春風五馬記曾陪古之遺愛誰其嗣客竟
何成此又來萬里海山雙淚缺半生盃炙寸心灰不知夾道
青青柳怎度秋霜二十四

讀梓廬重過兗州有感作次韻

錢世錫百泉

九原不作絕堪哀世路悠悠泛泛陪可奈船唇鞍背倦彌

思王翰李邕來偏多虞陟真憐驥豈少桐材竟作灰況復
年華如逝水滔滔東去肯重回

陪錢學使擇石先生暨公子百泉陳梅軒兩孝廉同登

泰山聊短述七絕句

上山里四十中垂十四里空鎮不言高天下自小耳
山脈出乎震山色未了青自有日月觀日月不曾停
不見海之寬不見野之曠一派紫煙中邛堽成波浪
南海奉大士東海奉元君千劫善男女膜拜各頂焚
玉皇閣之院石簇如花乳以手摩挲三此是最高許
渺渺吳江練指點若為關却下南天門徂徠低於檻
其日十月交暖地如春明道士言往歲此時臥雪橫

丁酉

存四首。是歲南歸
詩母病不暇多作詩

春日歸舟集唐

曉風芳草竟芊緜
画出清明二月天
行盡江南數千里
一邨桑柘一村煙

錫山道中

路入江鄉野趣饒
一川新碧釀春醪
牛毛雨細簑衣重
鴨嘴船輕櫓唱高
漠漠生雲山戴帽
青青依岸草連袍
此時北地乾風起
眯眼飛沙聒耳濤

續孤兒行為汪進士輝祖賦

孤兒苦孤兒十歲喪父纔知名
與數兒今成進士不見父者三十六年
所孤兒苦招魂南海海水有時乾
兒恨何時補解一孤兒苦孤兒不苦兒
有兩母昔之兒負薪行汲水今之兒飢
母哺寒母翼兒何苦之有晝出塾夜歸
覆讀晝之書篝燈熒

焚兩母俱或舍而嬉欲咎不咎淚應聲落如走珠思古之人
捫足而號其痛又何如解蜂蠆之毒母則愛之茶藋之甘母
則茹之嗟兒懵懵其何知解兒舉於鄉念我出腹之母不在
堂兒出身於殿廷我嫡母之計又驟至乎我旁母兮母子上
有高高者天下有沉沉之淵孤兒哭行人願解蕭山縣東門
外四十里有大義村村中雙節坊白石如礬大書特書姓氏
不刊慈烏提提羣飛千百集於斯村之人黃髮童齒來觀賡
咨吁嗟母子其知之解

冬日扶病送黃穉圭謁選

被路驚兒酒衝波島嘴船送君方遠道後會却何年交重情
難割天寒景易偏始徵叅校共入薦姓名連自笑辭毛檄非
關讓祖鞭烏私憐宛轉鳥舉看蹁躚節掾承家在聲華注考

先相違叨臭味倘念問沉緜鳳子能詩句并煩和短篇

戊戌

存四首。是歲將舉南巡盛典杭城設總局上游以余稍習掌故令住局經理書畫等事并屬專撰三天竺志以供陳設凡兩年無暇作詩

秋日送邵二雲太史入都四首

書滿船艙月滿川秋行如画望如僊乘風此去扶搖上游翮
蓬萊尺五天

先生經義析紛紜讐討遺文補綴勤郭璞後身有楊子趙岐

今日折朱雲

太史著有爾雅正義及孟子說

寫來影子有王儼柯氏新編體未宏東馬南狄誰有筆千秋

述作待君成

太史將有事重輯宋史

昨秋夜夜傾濁醪煨芋剝栗持蟹螯此會匆匆後會渺送行

跼跼心煎膏

已亥

存三首

夏日重過古招賢寺老僧出吳鐵生為伊作寒林流憩

畜屬題二首

門臨寒碧徑通幽三十年前記舊遊倚檻青荷猶似鏡照人
白髮已盈頭

寒林看盡煙雲態老衲坐忘現在身不是鐵君誰画得閒中
滋味定中神

湖上歸看紅葉作

誰把霜天渲染成水枯煙澹豔彌清千山春色崢嶸在一樹
斜陽歷亂明替我破顏紅可借對伊搔首白無情西風方便
休吹了畱取光華照酒觥

庚子

存一首。是歲相國三公提督浙閩例赴江南迎駕令余隨營襄理筆札既

回鑒相國又攝浙撫篆今佐幕務鹿鹿送相國入都乃歸結牆下小軒韓城

相國為書額諸君子為繪圖賦詩余有自述一律傳之武林咸誇之越二十年遇故

人鮑叔飲猶相譔云君小軒詩有自愛廉隅方角柱未辜風月直標彪之句便可入

君墓誌銘也惜
全首竟失記矣

追題陳匏村湘煙嶽色圖

我生五嶽歷其三所未得覩恒與衡昔我大父南嶽行采芝
嶽麓繪畵成陸堂初白諸老為題句一時傳誦今藏篋近讀
回溪侍郎集衡湘諸篇詩筆何崢嶸能使山水傳其聲令我
神往心怦怦匏村居士侍郎友少偕席斫以詩鳴亦有湘煙
嶽色畵廼從令弟作宰游楚志所經湘波九曲衡九面尺幅
依約點綴清據石而坐領其妙掀髯一笑餘風情吁嗟乎匏
村苦吟四十載不知生計何經營只今一帙詩刊未卒業奈
何嘔出心肝還委形令弟對圖三嘆息索我追題涕淚并湘
水無情嶽無色魂招不來煙冥冥

辛丑

存三十四首○是
歲掌教荆川書院

元旦口號二首

莫歎辭官守硯田老親減病復增年今朝元旦晴光好且喫
糖湯滴粉圓

婦無嫁物我無田舉案今朝共百年一笑呼兒將酒飲傳家
畱得瓦盆圓

正月八日種梅招同秋塋小飲叙話用東坡送曹子方
韻

曹子水東住春波橋約門瀾偏仄守市巷吟唔老儒冠勤鋤
手腕脫苦讀舌本乾彈琴風起谷落筆水下灘於我夙臭味
與俗殊醎酸快晴逢穀日偕約赴韭盤舊踪嗟何濶新歡暫
以安執壺斟雖淺三人皆不善飲呼燭話未闌君腹富有書我身輕無
官道貴用所長術忌趨所難寧甘驥伏櫪詎厭鮎上竿既醉

一短謡相期保歲寒

上元前一日同人集秋塍齋以金壽門徵士畫贈尊甫
穀原先生梅花燈為題各賦燈詞五首

日昨巡檐未破胎
光明忽現數枝來
冬心舊筆生春色
疑是相思一夜開

二十六郎蘓伐羅
自題自西廿年過
今宵簾外溶溶色
未讓

揚州明月多

畫款稱蘇伐羅又稱二十六郎乃庚辰年徵士與尊甫同寓揚州時作也宋閻秀詩有不知簾外溶溶月上到梅花第幾枝之句

堆繒盛繡嵌玻璃
五色流蘇八角垂
爭比橫斜幾枝墨
清光疎影照深卮

春節番番揔異鄉
幾持故里故人觴
燈明照見繁花插
繁似愁人兩鬢霜

曹子清臞骨有仙

種梅

蔣生口吃腹便便
春踏歌聯臂當時伴

相對燈花非少年

上元日同人集小軒適春雨攜觀姜西溟先生手書上
元讌集詩長卷即用其韵

新年冷舊雨宿酒餘晨酣陋茲巷小小愧彼府潭潭遵路念
執祛治具重盍簪薄肴配瑣細雜果羅酸甘驚接陳遵坐劇
愛康駢譚牽臂柳貫魚隨肩靳附驂偕來坐草榻流覽抽書
龕商量新義獲鑒別古情諳剪韭餅乍烙烹茶湯細燂粗擬
蔬筍約詎真翹蘖耽少年憶徵逐中歲間北南千里腸迴九
一曰秋隔三出門徒勞頓開戶得討探斐述紛足羨漫遊默
自慙頽齒棄短檠枵腹類空壘閣枕目鰈鰈窺鏡髮鬢鬚行
迷覺已達知非憂如惙游筆近稍綴緒言幽是擣空螯持螯
螯專車謝洪蚶自怡聊復爾持贈其何堪

是日出雜綴拙案相質

我技齊門

瑟君術燕人函佳境終啖蔗榮名佇傳柑

曹蔣均以宿學屢躋場屋

羽豐展秋

鶚筆快抽春蠶勵志老須壯謀歡暫弥貪燭斜轉北斗鐘動

浮東藍

舍側有金銘寺范成大詩東藍午齋動

近游期竝權後會仍開觀

與種梅春雨約作東湖之游

二月二日同人再集小軒追和曹倦圃先生金銘寺四

詠

橋李亭

倚寺乍誅茆迎門新嫁李暇日讀春秋徘徊古亭子

范蠡湖

之陶為朱公曾冒吾家姓顏充香火僧日守碧湖淨

天對室

久化靈虛蹟偏畱禪室名天台何路去欲問古先生

一擊軒

一擊幾百年寺僧莫知處我軒初種竹早晚成陰庶

春雨屬題小軸

宜山梅溪作和者項東井雙律寫短箋詩思如梅冷一畫名

曰簡老梅立孤梗

當是梅下

杖人乃是宜山影別有鄧尉香

修廣略相等吳門碩藹筆與高無畦町願又自題詩題是宜

山省三紙裝一軸裝自蔣生并吟之復跋之託意何清迥香

菴春草荒生壙寒蛭哽覩此零星墨令我心耿耿拂拭念前

修俗子其誰肯

百泉云小小詩點次極老

種桐

詒安堂前商種樹松桂榆槐類難長那能朝種暮成陰迹我
生前一瞻仰計惟梧桐肌理疎發幹抽條易騰上呼花兒匠
擇高本種出透簷東西兩新枝踰歲果起擡翠葉滴雨便流

鄉賢堂何人築何年始里老茫昧失稽叢棟桷礎樞制近古雖
無華飾頗深廣我購之胡榜書陸聊取吉語名仍往始安堂舊榜陸東村
老人書仍之先人敝廬故多梓我實自誦非寄想桐梓貴皆琴瑟材
檟棘賤寧丈夫養我今對桐如對梓夢裏碧雲雙滉漾桐兮
速大陰速稠蔭我暑堂滿張幌安排石几鋪竹簟脫襪涼陰
坐搔癢

答客問詩

劉川書院作

生心而起如其面此事分明不易窺見果知因通妙解積多
成少忌常師巧餘力外誰能與意盡言中未是詩書卷仍教
捨筏了性情詎是刻舟為漸春兩云真解脫語乃知依樣畫葫蘆非善學唐者

偶舉異文同義數百條示塾童系以詩

六體流傳別諸家載籍繁堪啞呼杖杜莫漫改金根見少休

多惟知新就故溫讀書慎難字杜老有遺言

題東野集聊解前人小魚蠅蠅之嘲

霜清輒山骨水清鑑石髮夜蟲晝不鳴冬花春不榮徑險無
坦步絃急無緩聲冰心豈發熱薑性豈作甘有窮如東野其
詩固應寒器量生是隘遭逢復抑之勁根迸石罅那有穠華
姿格幽敵韓豪詞警異僧瘦俗腸塞羶肥爭逐海畔臭苦藥
美於回瘴疾藉以救雖非萬里流沛然決江河掬露以盥手
所珍不在多

題高續古刻錄

說友賈之客似孫虎也子不以人廢言筆札並可喜昔披咸
淳志博洽賅終始謂潛所纂
臨安志近乃鈔刻錄頗亦簡有理漢刻嶠
於唐置縣治久矣兩火名異惡四山地洵美字書四
山曰嶠一間艤雪

亭今古風流侈王謝及孫阮二戴之所履秀異不忘杜清妙
亦稱李豈可無述焉錄芳具源委掌故書有稽蟲魚詞非詭
幽事致復佳品茶品泉水鄞人曰安之剡長時則史錄固署
高名高實史所使永和訖嘉定論列賴有此我為剡寄公愛
剡入骨髓思晉宋後故條次洎今止倘能吮兔成敢避續貂
嘗借書似剡州欲錄將曷以俳徊鹿胎山悵然暮煙紫

昨見芝谷句今日過實性寺題於壁

花微含露啞其策竹亂抽籬穉且狂曲徑幽深詩不屬借人
好句寫禪房

病後將自剡歸留題塾壁

二三學子論文乍造次家書待米回桂老多年愁客折榴花
七月送人開

皆塾中所有

剡谿秋漲新添櫂石屋冬遊定把盃

與芝谷約

破壁留題增一帳為曾消暑養河來

破窗七影詩有引

戴高士名晉字康侯精画理尚志隱居不娶曹倦圃先生嘗
為之傳沒葬於儂家放崔洲旁繪有破窓七影圖冊黃葉老
人題七絕句於後弄家久矣乾隆辛丑六月十八日大風海
上來拔木損人廬小軒之窗也破累月不能脩是秋適汪
雲壑修撰假歸與春雨訥齋約齋秋白秋塍菊圃諸君醵飲
小軒中徵題賦詩余欲為破窗解嘲也因出高士畫冊觀舉
坐歎賞不置遂以七影為題分七客詠之而余乃全和焉

破窗竹影

衰顏忽倚叅差玉貧舍何來瑣碎金早被秋風穿老屋空餘
夜月散寒林數殘个个分明字画見亭亭寂寞心拳手支頤

偷眼處不堪留客一沉吟

昔人評黃荃墨竹獨得意於寂寞間拳手七字用葛斂修竹軒句

破窗蕉影

一片雲遮百孔疎雲衣縷縷碧光虛紗痕漏月秋陰裏紙角
鳴風午夢餘拂檻涼分名士扇窺簾綠上美人梳硯田仍白
衫仍薄相對離披不可書

破窗松影

歲寒庭卉已凋餘猶有冷青照敝廬蠹殼卸來和葉落龍鱗
活處帶雲虛聽濤入定風微後捫腹生疑夢覺初此樹有心
似相顧牽蘿補屋計何如

破窗梅影

如許支離如許枯只宜冷屋伴潛夫羅浮夢轉空諸有環佩
魂來知得無寒陋室中慙玉照橫斜竹外想山孤漫教吹落

隨波去索笑窺檐未肯糊

破窗燈影

穿風白屋夜生寒搖檻紅燈暈欲殘半減半明和壁動宵深
宵淺護書攤佛龕照冷懸光小旅夢吹醒落燼乾剩有箇中
無盡意漫云已破且教完

破窗峯影

插雲曾仰湖西秀列岫也生硯北霏窳堵亭亭來屋角芙蓉
朵朵上簾衣淡於暖翠浮嵐西遮到曉風殘月扉未是真山
還不厭看如太古意何微

破窗鶴影

怪底宵深了鳥垂昂然上檻向人窺簾風窸窣搖將舞庭月
婆娑顧自嬉閨苑書遙猜欲到荒洲夢斷騰相隨

儂家放鷗
洲今廢

善

廬獨凍吾甘受明日無糧累汝飢

罌林雅集詩有引

辛丑十月九日余與葉芝谷史危崖三人同遊剡南山之白龍潭即罌林也芝谷弟子薛章二生從有近村周君攜子擔酒至飲於林下小菴因取前人剡中詩窗前王謝舊煙霞句為韵分賦五言古詩各一首其不能者我三人代焉合錄如左

梓廬得前字

城南白龍潭潭小蹄泐然萬石鑿潭上千樹簪石顛一去餘十里重來準十年歲年外曾游此林指鵬脚轉街循鵝卵圓栗杖童一手竹瓊夫兩肩村入穿村出山背翻山前犂确步愁窘授蒞衣屢牽曳行及嶺過少息團焦便石塊積鐵奚苔花連錢圈

樹怒撐石裂藤強縛石懸石立人蹶起石仆獸橫眠石亂點
樗蒲石長走蜿蜒頂石一螺佛罇石一線天罌林近錫名剎
錄古失編怪奇狀莫究攘剔事宜先礙石多可伐頑石去乃
妍鑿湏五丁斧驅借初平鞭商量花竹補點綴亭閣偏移之
蘇與杭游接朝暮趼乞誰萬錢費老我一壺專興賒託渺渺
晷短增拳拳寒林翳景斜落葉紛風旋鴉歸翻何急馬飢鳴
可憐一袖坐打盹不知客去端

芝谷葉封唐得舊字

昔有白鬚龍夭矯挂巖岫翻身潛一穴爪甲勿復覲何物
驚之起冰雹亂飛走落地化萬石四巖如駭獸神鞭不停
催黑夜互奔湊山靈工佈置一一獻秀不量却壑小欲
與台蕩鬥遂有碧眼僧依崖結雲構亂石成主賓排衙列

左右至今數間屋猶俯一虛竇我來值孟冬木落山容瘦
竹影拂衣行苔紋學面縐盃盤藉荒草厨釀移相候少長
聯七人煙雲滿雙袖默數幾回遊人老山依舊山鳥都相
識飛飛還余就

危崖史載筆得王字

楚南故多石茲石也莫量吳興號石林茲林復相當昔遊
我亦從今感人云亡

謂丁子端木辛
郊從游與焉

且喜冬景霽林壑團幽光

山鳥隱一鳴山花淨小香橐橐聲續續樹子落井床投衣
乃羣起搜勝各飛揚或昨嶠峰上或谿訝谷張或穿厂塢
塞或履石堂皇或闕澄潭窅或披叢篠荒或臨深色變或
憑高躡長或騎樹以過或梯藤而昂或衣捐輒留或手刺
忽傷或故溪千子或新術相羊或後先不顧或彼我相妨

或倦則稍偃或仆而且僵見險其肯止足爾猶臂攘命豈
鴻毛輕一笑甚乘堂有美得地主修潔具壺觴速宜飲一
斗約各賦一章猗歟夫子筆五言續諸王諒哉吾葉大臭
味夙所詳人生幾知己歡咲淩幾場割將塵累盡獲此野
趣償金石有時救斯遊難可忘

危崖代周君作得煙字

一塢三面石雜樹纂其間孤僧棲若鳥荒寂稀人煙忽傳
高軒過驚起鹿豕眠竊聞壯遊者必歷名山川且勿言五
岳南楚北窮燕諒非培塿卑足以曠心顏且勿言滄海乘
槎泛無邊諒非杯杓小足以曷孽觀手握少文畣口吟康
樂篇乘風萬里浪縱轡千仞顛庶幾騁遠目笑揖雲中仙
藐茲數畝山蟻封在大千豈堪愜豪賞願以枉羣賢願生

陳未已夫子曰不然人境無顯晦人情自輕軒即以剡而
論畧可識其端城北子猷橋谿客一艇旋城西安道巖泉
注一滴圓兩地區區耳傳說豔千年安知小罍林勿自今
日傳況乃石磊砢兼以樹迴環會心詎在多壺中別有天
須弥與芥子小大本不懸泰山與邱垤一視何擇焉吾意
適其適此理元之元聞言發深省欲辯乃忘詮願言從之
游聊為具盤飧

芝谷代薛生作得窗字

罍林只尺耳眼未窺山窗先生愛幽討理屐到舊邦追陪
幸奉杖招邀偕涉杠小春爛紅葉翻風快晴江清曠入欣
矚煩紆豁愁腔登嶺勞榮塞叩門靜吠唳竒境洵未有雄
姿孰能降巖高凸礪硤洞古竅崆峒勢離攘峯獨形門夾

路雙層起宛疊浪亂落疑奔瀧中斷或若闕斜連亦如砥
砢廣橫卧安崕陵俯瞰雙樹緣斑駁蘚石抱槎枒樛勾稜
衣角破殷谷足音窅掬月失寒泉鳴玉想春淙僧菴小結
草佛座低飄幢青含冷松照響答幽磬擬我聞永州亭萬
石列褐控石林則在下高見太湖艘各地因人重亦鼎有
筆扛山水經拂拭千載氣勢麗剏人得先生振滯啟愚蠢
林僻開詩社雲深對酒缸從茲風雅擅名與葉柳控苦江所切
漸膚學者立雪徒踈蹢何當棄塵滓來此事耕穫夜歸勉
賡韻豪弱寸蓬撞

芝谷代章生作得謝字

羣山抱一庵矮屋依巖架欣從長者後來游及閒暇曉露
午猶滴秋花冬未謝林響松落子樹迸石開罅一穴不藏

龍龍潭名亦假崖壁故自奇攀躋孰能罷金庭與天姥相
擬不相下誰似柳州柳售以四百價白雲滿空山更構雲
中榭

梓廬代周子作得霞字

霜晴快山曉曉起鵲喳喳聲未已門揖長者車亂紅
埽階葉輕碧斟杯茶願言執鞭去一牛鳴地斜畧林富奇
石森森蔭木嘉貴遠恒賤近在剡人勿誇高情入選勝名
詠各咀華青山驟聲價品題十倍加比玉剖諸璞如金披
自沙小把菜桃渚小隻雞烹家拾薪煨土芋炊飯蒸蕃瓜
閩俗呼紅
芋為蕃瓜野外無供給尊前一笑譁詎嫌味澹泊翻合興幽
遐冬曦人盡愛春風望未賒幸哉廁童冠留名辱煙霞

散步

晴夜皎如雪處獨愁無那況於病滿中晚飯不肯餓西巷有
塾師散步聊一過甌茗欣接談篝燈未妨課相送覺久矣霜
氣削顏破滿階涼潑水人影隨一个街樓尚絮語微聲落咳
唾仰視小團團敲扉童則卧

蚤起題鴨脚樹

一樹萬萬葉一朝齊卸地乃知昨夜霜殺氣無聲利

次答史危崖秀才見贈初度之作來詩用東坡生日劉
景文以古盡松雀為壽詩韵

我身無六尺鱗鯉寄寒廊躑躅羸於豕伶俜瘦於鶴頭白冬
雪侵面黃秋木落日復日如夢歲仍歲開篇作事鮎上竿行
年鉅赴壑莫沙勞何益履冰前更却一錢弗留囊九經但束
閣遽知進退非杜歎情衷惡故交課推許新詩增惋愕滿百

即幾何過半略如昨得失難蟲等逍遙鵬鷗各十年奚必字
三畝便可託無魚官彈劍有酒須盈爵及夜秉燭遊流光如
電霍

遊四明山石屋禪林寺

有引

謂四明有二百八十峯固未知誰悉數之也但梅福記稱四
面形勝各有區分道書丹山詠亦四面分述之及考南雷老
人撰山志九卷僅詳東南北三面於西略焉豈足跡未及歟
余在剡久知此山面西諸峯迤南北五六十里間林壑多佳
處而最勝者曰石屋禪林近僧恒傳所結淨業居士張克昌
所題也乾隆辛丑十月二十四日偕葉秀才芝谷出嵊縣城
東渡剡谿再渡棠溪二十五里抵上林村宿居士家居士年
六十九矣有內行善氣溢於容所居曰問心居有小亭小池

手植卉木皆郁郁有吉祥氣門有古柏可千歲前三年冬夜半村失火火周於居士之廬而不熱人以為為善報居士為余言石屋故無人跡到志稱有耕庵者久廢乾隆八年恒公始自天台清涼寺來獨掩關處昌聞而叩關與語密諦頗相入遂交焉恒能感十方檀施以次就山築礎高下三層前建佛樓中後建佛殿各廣五楹翼以廂又置寮房厨舍一帶於左又鑿石甃級通山出入路積二十餘年而禪林成皆恒之功也一日大雨遣人招昌入山曰必無悞至則恒方浴浴已告昌我一身來一身去惟君知我故相邀今日當訣矣即升榻趺而瞑眾號不已頃乃復開視曰奚溷我為如是可少待其夕言動如故及晨獨坐怛然而化實三十一年五月十六日也初恒謂昌此處可住三十眾及是果符數昌素見恒陽

陽如平人不謂其生死際了了如此居士又言此去五里抵山麓有小山曰海螺峰盤其下折而入有澗自峽中西出始沿澗北行三里許過澗南有十丈巖稍上為峽口窄甚又沿澗行四里許峽稍寬兩崖各有梯田馬士英嘗築宅於此將為竄身計山陰王遂東貽之書云吾越是文章節義之鄉非巖坵納汙之地乃不果來今宅犁為田頽垣累累存土入猶稱閭老基君子聞而唾之以為名山之玷也自此過澗北行則緣崖一綫石齒齒無坦給又三里至龍潭潭在崖下口徑丈水盈盈樵者繫石於藤墜之愈墜愈不及底瞰之寒神惛骨不可耐又上稍平處澗漸為池就飲鑒毛髮水底石皆碧玻璃色池旁有亭昌所結其上流數疊到池下復懸流十數疊入於潭蓋山行終日水聲中而水聲以亭為最快再上路

益陡巖益竒貪瞻則失步顧步則失瞻俛仰恒不給云又三里許諸巖石詭形殊狀益聚而聳且逼不知所由入而禪林在焉禪林西向臨澗兩巖左右挿復一巖擁於背阻三面而虛其一礪以外無隙土也自峽口來巒迴澗折一重一掩不知凡幾曲故傍澗入者路未轉則前遮既轉則後合從八九里外睇禪林若懸梁架兩巖間既近轉莫見矣左壁稍前一峯突如圉四無屬頂圓平可七八畝產石耳堅如鏤右壁稍下有凸石隙方而長數十丈自內視之如門掩一扇者然所倚三巖皆靈峭翠駁如画相向咫尺立可翹視不可平視憑樓西眺百里外則太白如檻溪如交練潭如散星城野如錯繡近山如釜如箕泉自背巖左右出琤琤如鳴玉味極甘坐蒲團酌泉試茗靜觀諸色相身如遺也余曰然則曷以屋名

曰有小石厂在禪林側容數人坐無他奇也余曰止是乎居士曰未也背巖之右有微徑從榛莽中盤而上過下上金鐘寺五里餘始達峯之巔峯在西面數十峯中最高亦最銳銳處可畝許金山大勢西為背登此則東南北三面之峯皆出焉下矣問山有豺虎否曰無之曾見山羊大如牛而毛赤意甚馴聞有神馬飲於澗人圍之一躍過巖去有五色蘭恒曾得一本以供佛余曰尚有異乎居士又言昌於山三十年已若几牖床榻之知其處者若夫幽清荒恠之氣出沒湛顯之狀離色遁形風雨乖合昕夕譸變為喜為愕至者自領之昌有舌不能言也三人相顧笑次曰入山一步一仰視又次曰出山一步一回視益信居士所言與所不能言者皆不謬宿禪林之夕與居士卧談禪至夜半聞風聲如虎乃不覺畏弥

覺清也余念禪林自始事閱今未有述故次居士言綴詩首
且當記居士廼不為文字禪者故無詩

一徑穿山腋一樓架巖腰三朶五朶簇七曲八曲饒讓左右
忽歇斷後前仍邀瞥喜關石懸却怖窪阬暝黑入澗草挂翠
分崖竹搖鼠延踵各曳猱升手轉招欲踣峰乃隔就掬泉乃
飄石圉圓自脫石稜孤則標西方聖西向三屏翠摩霄屋從
開闢有林費歲月料我來僧事具僧寂我心惓上方了何見
噉然瞑呼樵猛風挾猛虎深省發深宵入夢還顛倒顛倒山
之條

芝谷云力
追東野

同梓廬先生宿張居士宅

葉封唐

牆外見遠山徙倚池上亭亭虛送日落疎木透繁星改席
敷小軒一鐙風搖青主人謹事佛勸客仍葷腥他年詰從

頭此地余再經，曩懷間何濶。新懽醉冥冥，幸陪文章伯。更親鸞鶴形，案頭天竺書。夢覺梅檀馨。

入山小憩龍潭作

葉封唐

青山結靈境，造物逾巧匠。白雲引幽步，路轉出雲上。回瞻記九鑠，前睇更重閭。竒峯銳於錐，邃谷深如盎。山交澗窘束，亭出山退讓。千泉共一響，萬石各一狀。斑駁苔蘚牢嵌空，洞穴亮龍潭。貯天影，潭碧如春醪。僧屋乍隱現，客頭頻俯仰。力疲步小駐，地窄心弥曠。便想出山時，林巒異背向。一一目送迎，定復成新樣。

宿石屋禪林作

葉封唐

佛處聖山凹，三面峯陡絕。左如馬首昂，右似駝峯突。背負白額虎，額高蹠削鐵。一面獸凌虛，天光補山缺。樓前合雙

澗澗邊揀萬笏石屋濕生雲石泉白疑月峽訝巨靈分書
或靈威竊騰身出千仞路記刀環折山門逼天門語笑聲
能徹燭上羣動息斜光漏深樾不知風聲猛祇道千崖裂
清禪合幽興擁被猶細說

我歸行示三子

我自剡歸拂雪帽迎門兒立身長俱大兒過頭次肩及阿虎
最小奔如駒上堂拜母婦攜女偕至呼婢鷹者奴謂我生日
羈中孤欲補卮酒為我娛我生五十浮雲徂行已無聞言增
吁幼逮三世雙髻趙曾大父年九十餘先型舊德恆詔子未
能聰聰聽其麓大父賁志文藻殊我先太史亟稱諸大父菊隱先生年十四工
詩為先竹坡太史公所最賞因言於沈山子先生以女許焉壽未週甲我甫晬喜我不啼從乳雛至
今披囊流淚珠我大母孝宗黨孚七十為婦躬洗滌我自踰

冠兩世殂天樂漸減人事拘憶我鍵聖藤花居冥搜遐討窮
朝晡思獵經史咀膏腴上追著作之先儒秋風一薦慚區區
歲荒命蹇飢來驅不殖而落初顛辜痛哉我父生拮据拮据
力養三紀逾平生篤行厚有餘考行人言厥字符無尊無賤
無親疎謂見叔度鄙若祛治河治賦經國需為人必忠曾氏
徒至和而介嚴錙銖千金聘却千里途我初應舉馳

皇都目輕世事神睢盱六上睿官六予罷少壯意氣銷歸烏
其間奔走跡難數水萍風絮吾非吾吳頭楚尾歷郡七江淮
揚海松常蘇東登泰岱西過華西至於幽程崎嶇十三州府
河南北所未得到汝一隅其歲在己狂瀾輸非河伯仁吾其
魚大東小東亦屢矣側身鄒魯懷唐虞蘇門之山津門沾殘
盃冷炙無處無挾策傍人儕史胥如豚入苙禽入笵親舍違

兮子舍虛往往登臨慨慷呼痛予尤痛戊冬初我從從兄官
幽墟我孽自作天不誅奔我父喪肝腸屠五千里號風雪衢
風淚雪血雙昔枯我無伯叔兄善病每念門戶我心痛一官
博士聊竊精剡山青青剡水紆耽山樂水安搶榆忽徵校書
來西湖縱觀載藉誠以快課登薦簡非所畜

彤廷引

見昇以縣親民官重心懔懔注吏部選官便除接家人書驚
還瞿假歸省母母病痛支撐一世真艱劬今雖家食貧無襦
百年幸得春暉舒竹新荷碧花絳跼小庭風暖孫肩扶怡情
散鬱顏姁姁差勝苦藥常咬咀我敢稱老白却鬚腹鳴鬲病
鳴如蝸不能忘刻尋鷗鳬鹿胎山樵嶸浦漁逢人不擇相依
於賣文得錢苒水湏行就木矣何歎歎我觀三子非充閭廉

也稍點和也愚器淺受少其依乎天生汝幸五官具具五官
閑且讀書且磨破硯守破廬三百年來南門朱勿餒其鬼慰
吾姑喫人之虧務已務舍此而外無良謨此是我家秘密藏
三無漏學一言如兒方聽我莫我迂兒子牆上難為趨歌器
撲滿有以夫

壬寅

存七首○是歲掌教金華麗正書院
為舉業文若干篇請鄭誠齋先生教

書元暢樓壁

前家令曾留八詠元學士來題一篇如此江山良不惡

趙魏公句

春

風秋月自年年

濯晴江云春風秋月
佳在別處移不去

霽夜與阿廉聯句

礎水痕就燥簷星光猶濕梓廬林穿獨螢遲壁叶亂蟲急廉
擺草風影來滴蕉露聲入梓廬新浴膚汗收深坐夜涼韻庶

黑驚飛鼠翻梓廬細獸浮塵吸元微之有浮塵子詩蕭吹毫五字成閣枕三更及梓廬

有以納涼圖索詩者戲題予之

四株高柳樹一棚扁豆花納涼其間者一跌二立一眠樹而偃斜既解衣以磅礴科頭赤脚以徜徉焉用此縝締綰似半臂子似襖襠光塵既和同亦復何嫌猜一絲不挂乃是真解脫袒裼裸裎何別哉吾正欲放癡放顛盡破伯夷隘顛與君輩進一解皆隘切

蔣弁長既罷以別竹夫人詩見示索題

自從棄置半牀孤消盡雄心撚盡鬚無限秋風惆悵事一齊交付與青奴

閨世

閱世如碁歲歲新漫云是果莫非因盧仝馬異交從結李四
張三認未真鼠欲飲河寧量已烏猶擇木可憐人誰知淺水
蘆花裏不怕風吹有釣輪

述老喪居二首客婆作

頗知老去要顛狂可奈微歡事事妨書欲忘名人忘姓眼如
生霧鬚生霜貪遊偏乏樵夫足強飲終輸酒戶腸不及芙蓉
故園色枉入花底坐思量

值十月初
度接家書

移居前歲誅茅乍學圃今年種菜多蕭寺雅宜聽粥鼓范湖
劣可曬漁蓑故交閒淡稍來集野興清深不啻過一角沈樓
孤客夢柴門空閉鎖松蘿

癸卯

存三首○以下二
年仍在麗正書院

於友人齋飲罷重過七寶寺分韻得聞字

春陰帶殘醉晚步隨閒雲背城寺寂寂繞舍渠沄沄風微酒
醒入香妙心清聞門犬迎豈識檻魚食曾分竹新冒貓頭松
故拏龍筋散矚餘野意小恭隔世紛題榜非昨歲拈闌復今
羣迹陳一彈指俯仰其何云聊誦達者言即事多所欣曾有題僧房一
聯云但登閣看山常佳偶報客來茶正香

寄樓子上層方子元鵬各一首

貌似野人眉萬卷學為先輩肩一燈會凌絕頂窮千里脚踏
要從實地升右寄樓

海蜃青紅筆底浮一番緝縹奈清秋多應酒力睜茶力散却
不平毛孔收右寄方方善飲故云

甲辰存一首

過七里瀧作

左從天目山來脉可尋右乃是金華仙洞之山陰兩山門處
欲接不接劃如溝狹如巷其下穿過江流深臨江高高一凸
石本無甚奇天偶生人因嚴先生益重此石聲人因漢光武
益重先生名不知先生耽幽嗜逸本性情光武之天下原不
我與我非借以矯節而遺榮脫無故人作天子客星自照寒
江橫犯不到帝座世人未必如此驚先生亦祇淡焉漠焉蟬
蛻物外初何知重輕可怪謝皋羽衷忠亦近名何地不可哭
必割先生半席以為清我來瀧中行正值十月天氣晴千樹
萬樹紅葉明三灣五灣碧波平左顧右盼水送山迎西眉又
叫泉又鳴豈不頓消受眼福長此久留停榜人搖搖不肯住
竟過釣臺且報先生我東去

乙巳

序一首○是歲閒居覽所藏法帖以養心
心病漸愈因隨手劄論為石藥記如干卷

追題後齋從叔持硯圖有引

叔平生以善書名而齒中硯非學書之為也亦有孫慧而天
悲不釋乃寫已形坐持一硯旁貌厥孫執一環以侍硯者念
也環者還也蓋度語念釋在茲直與其還生耳乾隆乙巳夏
叔既沒弟輩慮久而失作齒意也俾余題一詩志之

三界輪迴事有之未須讀盡笑空思却愁羊祐尋環日已是
范喬哭硯時

丙午

以下三年並開居專
學形家言不作詩

丁未

戊申